

POLITICA

# De chi él l maor peis politich?

*L Consei de la Neva UAL à tout posizion te n comunicat contra la cernuda del conseier provinzièl ladin Luca Guglielmi che à tout deretorn l emendament sul 10% de la steora de sojornanza*



*Na sentèda del Consei del Comun general de Fascia.*

La costion dintornvia la proponeta de ge dèr l 10% de la steora de sojornanza regoeta te val al Comun general de Fascia per projec de enteres generèl no se à amò serà su. Do che l conseier provinzièl Luca Guglielmi à tout deretorn l emendament, da el prejentà, a la lege finanziaria de la Provincia de Trent se à levà critiches e permèl te anter la comunanza e i raprejentanc istituzionèl ajache no se enten la rejons che à vidà l conseier ladin a chesta cernuda.

Chisc dis passé à tout posizion con n comunicat l Consei de la Neva UAL; chiò l met dant duc i vèrsc istituzionèl che à portà a chesta situazion ma soraldut l palesa sie 'richiamo' al conseier ladin Guglielmi a no »vanifichèr la volontà de na istituzion e di sentadins che chesta la raprejenta, a maor rejon se se trata del ent più raprejentatif de duta la comunanza.«

**L conseier provinzièl ladin no à portà a compiment sie empen istituzionèl**

Ma fajon n vèrech endo. Descheche aon jà scrit sui numeres passé de chest sfoi e descheche spiega l comunicat de la Neva UAL »ai 13 de otober l Consei del Comun general

aproèa dut a una na mozion che empenèa l Consei de procura a ge portèr dant a la Jonta provinzièla na proponeta de lege per ge dèr al Comun general l 10% de la steora de sojornanza per la destinèr al finanziament e al sostegn de projec de enteres generèl che califichèa l teritorie e l'identità de la comunanza ladina e che caraterisea l oferta turistica de la val. L conseier provinzièl ladin Guglielmi se aea tout su l empen de depojiter l dessegn de lege che l aea jà registrà ai 5 de otober del 2021, donca amò canche la proponeta de lege s'irèa anter i gropes consilières del CGF. Ge vel aboncont dir – scrif la Neva UAL – che tel test del ddl, chel che Guglielmi aea depojità, no l é la frase 'projec de enteres generèl' (descheche enveze aea aproà l Consei general) a chesta vida l é stat sbetà de sie segnificat prinzipal che volea tor ite a 360 gradi i besegnes de la comunanza e la promozion del turism.

Chest l é demò l prum vèrech del conseier provinzièl: do aer mudà l ddl te n emendament a la finanziaria, per fèr a na vida che l dovente lege al più prest, l conseier se aea empenà tedant ai conseieres e ai ombolc prejent te Consei general dai 29 de november del 2021 a prejentèr chest

emendament a la lege finanziaria col medemo contegnù del dessegn de lege aproà da dut l CGF.«

Descheche aon dit dapò l conseier provinzièl Guglielmi à tirà deretorn l emendament e no l à più dat spiegazioni.

»Demò a la metà del meis de jené – scrif amò la Neva UAL – l conseier provinzièl Guglielmi ge à manà n message ai conseieres del Comun general de Fascia, al Procurador e ai ombolc de Fascia olache l met dant sia posizion con sfrontateza rejonan de costions che no à nia da veder con l dessegn de lege. Dai conzec palesé tel message se enten la confuzion del conseier ladin anter sia autonomia de dezijion (che vegn da la mencianza de n vincol de mandat, descheche l é giust che sie) e n empen istituzionèl che l à tout su, ma che no l à portà a compiment.

Chel che ne lascia amò più maraveé lejan la letra – fenesc fora l comunicat la Neva UAL – l é l conferiment da man del conseier ladin de n maor peis politich a n ent con obietives biot economics e de promozion del setor turistich, enveze che a chel che l conseier medemo ge disc »n Ent de union de Fascia«, per dir l Comun general.

MCI